



THE  
WILLIAM R. PERKINS  
LIBRARY  
OF  
DUKE UNIVERSITY



Rare Books





Q. D. B. V.  
DISPUTATIO THEOLOGICA.

De

# HERMENEVTICA VERA ET FALSA

Ad

2. Petri. I. v. 20. 21.

QUAM,

SPIRITU SANCTO ANNUENTE  
SUB PRÆSIDIO  
VIRI

*Plurimum Reverendi Amplissimi  
atque Excellentissimi*

DN. BALTASARIS BEBELII  
SS. TH. D. ET PROF. ORDINARIILONGE CE-  
LEBERRIMI, SUMMI TEMPLI ECCLESIASTÆ ET  
COLLEGII WILHELMITANI INSPECTO-  
RIS GRAVISSIMI.

Dn. Patroni, Præceptoris, atque Pro-  
motoris sui omni honoris & reverentiæ cultu  
devenerandi

*In inçlyta Argentoratensi Universitate*

*Publice defendendam suscepit*

Ad diem 7. Feb. Martij ANNO M DC LXXVI. hor locq; conf.  
JOHANNES DANIEL BUCH MOENCI-FRANCOFURT.

---

ARGENTORATI,  
TYPIS JOHANNIS WELPERI.

405230

copy

STATE OF NEW YORK

IN SENATE  
JANUARY 1877

REPORT OF THE

COMMISSIONERS OF THE LAND OFFICE

IN RESPONSE TO A RESOLUTION PASSED BY THE SENATE

APRIL 1876

Rebel  
m 23.7.12



# I. N. D. N. F. C.

De

## Scripturæ authenticè explicandæ principio & regula vera & falsa.

§ I.



**P**ræsenti disputatione *de Scripturæ authenticè explicandæ principio & regula differimus*; quandoquidem nobiscum, DEO volente, constituerimus, de classicis quibusdam scripturæ dictis, eorumque sensu, cum adversariis nostris, ex mente antiquitatis disceptare. Adversarii illi nostri, si quo scripturæ dicto urgentur, appellant vulgo ad explicationem Ecclesiæ suæ, & consensum antiquitatis, tanquam genuinus scripturæ sensus non sit, nisi is, *quem tenuit & tenet sancta mater Ecclesia, cujus est judicare de vero sensu & interpretatione scripturarum sanctarum, aut etiam unanims consensus Patrum*; quæ verba sunt sessionis quartæ Concilii Tridentini. Consona iis, quæ in Professione fidei, à Pio IV. edita, continentur. Quid huic principio, & regulæ huic explicandæ scripturæ tribuendum; & quod contra sit genuinum principium, & infallibilis regula sensus sacri indagandi, & percipiendi, prius ostendemus, & præsentis quidem dissertatione Academica, quam ad singulorum dictorum explicationem descendamus: Deus mentis nostræ nobis oculos aperiat, ut videamus mirabilia in lege ipsius! Amen!

I.  
Proœmium.



11.

*Distinctio-  
nes & expli-  
cationes  
termino-  
rum.*

*quid  
Prophetia.*

§. 2. Ut autem de sensu propositi thematis nostri, de-  
que statui controversiæ clarius constet, singula ejus verba prius  
erunt explicanda: subjectum est: *scriptura*, nempe καὶ ἑξοχὴν  
sic dicta, quam Deus sanctis amanuensibus suis, Prophetis &  
Apostolis, dictavit; eam ipsam, quam Petrus 2. Epist. I. 20. vo-  
cat προφητείαν γραφῆς: *Prophetiam scripturæ*; quo nomine, juxta  
Lorinum, *omnis divina scriptura censei ac dici potest*; quia, ni-  
si Deo dictante, mysteria ejus sciri nequeunt; *quidquid autem,  
nisi Dei potest instinctu sciri, Prophetia est.* Auctore Gregorio M.  
homil. I. in Ezech. confer Cornel. à Lap. Comm. ad I. c. Pet.  
& D. Gerh. I. c. Notetur simul, quod de iis præcipue locis  
scripturæ sermo nobis sit, quæ continent mysteria captum no-  
stræ rationis transcendentia, præsertim si accedit dictionis diffi-  
cultas.

*Authentica  
interpretatio*

*ἐπίλυσις:*

§. 3. *Authenticam interpretationem* eam voco, quæ con-  
formis est menti Spiritus Sancti, adeoque genuinum proponit  
sensem, specie non diversum ab eo, quem Spiritus Sanctus in  
corde habuit, cum verba ista dictaret, quemque ille vult à no-  
bis quoque apprehendi. 2. Pet. I. 20. vocatur ἐπίλυσις *Explica-  
tio, resolutio*, ab ἐπιλύειν *resolvere, explicare, sensum eruere*, si-  
cut Christus in parabolis hætenus locutus, suis discipulis peten-  
tibus ἐπέλυε πάντα *omnia explicabat.* Marc. IV. 34. Dividi-  
tur ibidem locorum ἐπίλυσις in ἰδίαν *propriam*, & propriæ op-  
positam θεόπνευστον, *divinitus inspiratam*, seu divinitus inspiratæ  
conformem. *Propria* sic dicitur non à *subjecto*, cujus ista inter-  
pretatio est; sic enim omnis ea explicatio erit propria i. e. à  
mente divina aliena, quæ ab aliquo homine singulari proficisci-  
tur; i. e. non erit propria; Nam & illa interpretatio, seu expli-  
catio ab hominibus quibusdam singulis proficiscitur, quæ cum  
divina mente convenit; sed à *modo*, quæ aliud principium, quam  
divinum, habet; & nexum subjecti cum prædicato alium,  
quam rei natura permittit. Unde patet, quæ sit propriæ oppo-  
sita ἐπίλυσις, nempe ea, quæ conformis est menti divinæ, & to-  
tam Ecclesiam, imo omnes homines, obligat, ut apprehendatur  
& probetur.

*principium:*

§. 4. *Principium* hujus ἐπιλύσεως rationem istam voco,  
unde explicatio primum proficiscitur, & in quam ultimatò  
etiam



etiam resolvitur, ita ut certus sim, me genuinum sensum apprehendisse. Hoc principium dividi potest in personale, & reale; *Personale* statuimus esse Spiritum Sanctum, eum ipsum, qui Prophetas quondam, & deinde Apostolos ita afflavit, ut non nisi divina oracula scriptis suis committerent. 2. Pet. I. *Reale* credimus esse ipsam Scripturam sacram, suamet ipsius explicatricem. §. 21. eamque in legitimo suo usu constitutam; sunt enim certi quidam modi, quibus tractanda illa est, ut suam ipsam mentem aperiat in locis hinc inde difficilioribus (*δυσνόητοις*, 2. Pet. III. 16.) intellectu. Hilarius prologo in Psalmos vocat claves; Nam liber omnis, inquit, similis est urbi pulchra atq; magna, cui ades complures, diversaq; sint, quarum fores propriis clavibus diversisq; claudantur: qua cum unum in locum congesta permixtaque sint, volenti unamquamq; ad eam aperire, maximam ignaro afferant difficultatem, ut claves uniuscujusque adis inveniat: sitque aut familiaris scientia cognitam clavem cito ex copia illa congesta in unum varietatis eligere, aut ingentis laboris aptam aut congruam clavem aperiendi uniuscujusque adibus invenire: quia ratio & qualitas non sinat, non suas claves claustris disparibus coaptare. &c. f. m. 338. Finis harum clavium, seu regularum, est, aperire mentem Scripturæ sacræ, ut, quia dictum non ambigitur, quatenus dictum sit possit intelligi: quæ ejusdem Patris verba sunt lib. V. de Trin. f. m. 59.

personale,  
reale.

§. 5. Ex dictis patet thesis nostra, & status controversiæ, nempe hic: An Spiritus Sanctus sit principium, & Scriptura sacra ipsa regula sacrarum literarum authenticæ, seu ad mentem divinam explicandi? Nostrates affirmant, ut colligi potest ex Form. Concordiæ Epit. p. m. 570. Et declar. p. m. 632. Pontificii negant, uti potest deduci ex Self. IV. Concilii Tridentini superioribus actis, hic plenius recensenda, sunt autem verba hæc: Sacrosancta Synodus ad coercenda petulantia ingenia decernit, ut nemo sue prudentiæ innixus, in rebus fidei & morum, ad adificationem doctrinæ Christianæ pertinentium, Sacram Scripturam ad suos sensus contorqueat, contra eum sensum, quem tenuit & tenet sancta mater Ecclesia, cuius est judicare de vero sensu & interpretatione Scripturarum sanctarum; aut etiam contra unanimem consensum Patrum, ipsam Scripturam sacram interpretari audeat: Etiam si

III.  
Status Con-  
troversia:  
Sententiæ

*huiusmodi interpretationes nullo unquam tempore in lucem edenda forent. Ita Tridentini loquuntur. Et Pius IV. in Professione repetit : Sacram scripturam juxta eum sensum, quem tenuit, & tenet sancta mater Ecclesia, cujus est judicare de vero sensu, & interpretatione sacrarum scripturarum, admitto, nec eam unquam, nisi juxta unanimem consensum Patrum accipiam, & interpretabor.*

oppositæ :

§. 6. *Dicas : Non videtur esse inter sententias Evangelicorum & Pontificiorum discrimen, quandoquidem sensus, quem Spiritus Sanctus per scripturas exponit, possit quoque esse ille ipse sensus, quem tenuit, & tenet sancta mater Ecclesia, & approbant Patres in explicanda scriptura invicem consentientes. R. Fieri quidem potest, ut Spiritus Sancti i. e. genuinus sensus sit ille, quem Ecclesia etiam Pontificia, & Patres unanimi consensu tenent, principia tamen, hinc Pontificiorum, inde Evangelicorum, non sunt uniusmodi : Nam principium Evangelicorum est harmonia sensus explicati cum sensu scripturæ sacræ secundum regulas hermeneuticas tractatæ ; Contra Pontificiorum principium est harmonia sensus prætensi cum mente seu explicatione Ecclesiæ & Patrum nonnullorum. Principium igitur sensus divini quoad ipsos, & personale quidem, est Ecclesia ; reale vero consensus Patrum.*

§. 7. *Quæ ut explicatus dicantur & intelligantur, sciendum est, quod vox Ecclesia apud Pontificios ambiguedicatur ; vel enim intelligitur Ecclesia synthetica, vel repræsentativa in conciliis, vel monadica, i. e. solus Pontifex Romanus : Et synthetica quidem iterum variè accipitur ; vel enim denotat Catholicam Ecclesiam, sicut per universum orbem dispersa est, & quoscunque fideles complectitur ; quo sensu accipiunt illi, etiam Pontificii, qui Romanam suis limitibus circumscribunt, & non nisi partem Catholicæ eam agnoscunt ; vel significat particularem Romanam Ecclesiam, sicut ea quorundam opinione censetur Mater, Caput, Magistra omnium Ecclesiarum ; vel denique notat Caput hujus Ecclesiæ, Episcopum Romanum, qui, uti vicarius sit Christi, & successor Petri Apostoli, ita etiam iudex omnium controversiarum Theologicarum, & promus condus infallibilis genuini sensus sacrarum literarum. Nec insuper*

per habenda est distinctio inter Ecclesiam Romanam , & curiam Romanam , quæ non nostra solum est , sed etiam magnorum inter Pontificios ipsos virorum , novissime Johannis Launoji , inter Theologos Parisienses ut ætate , ita celebritate præcipui. Distinguenda est etiam Romana Ecclesia in vetustiore , sicut ea fuit tempore Pauli Apostoli , & aliquanto post ; & recentior , qualis sequioribus temporibus , & novissime evasit , quando decreta sua in Concilio Tridentino promulgavit. Ambigue etiam dicitur *unanims consensus Patrum*. Non enim exprimitur , qui sint illi *Patres* , quorum *unanims consensus* prætenditur ; quod tamen necesse est , cum inter Patres nonnulli , & plurimi quidem heterodoxiarum , etiam Hæreticarum , insimulenter , saltem ideo , quod Explicationes Hæreticorum nonnunquam secuti sint incautius , quod de Hilario , Ambrosio , Didymo , Hieronymo , Ruffino &c. Origenis sequacibus ; alibi scriptorum nostrorum ostendimus ; Neque explicatur , quis quantus , qualis , & unde sit , ille *unanims consensus*. Velenim intelligitur sensus & consensus omnium antiquorum Patrum , vel quorundam ; si *omnium* ; quæro , unde de eo constet ; quandoquidem non omnes Patres sensum suum de scriptura sacra sive tota , sive aliqua , scriptis prodiderint , aut si prodidissent , ea hodie non exstent ; si *quorundam* solum ; *unanims* non erit consensus ; aut prius probandum fuerit , sensum illum *quorundam* Patrum esse *omnium* ; hoc vero æque impossibile est ostensu , ac prius , sed de hoc infra.

§. 8. Hæ distinctiones , uti sensum Tridentinæ regulæ faciunt ambiguum ; ita declarant , quod nostra regula à Tridentina *ἡ δὲ διὰ πᾶσιν* sit diversa. Fieri enim potest , & frequenter hactenus factum est , ut quem sensum Ecclesia sive synthetica Romana , sive repræsentativa conciliorum , sive vetustior nonnullorum Patrum , sive Monadica i. e. Episcopus Romanus tenuit , vel tenet , sit sensus , qui nostra saltem Evangelicorum sententia abhorret à sensu Spiritus Sancti , quem in S. literis declaravit ; imo etiam à sensu quorundam Pontificiorum , qui sensum regulæ Tridentinæ hoc vel isto modo acceperunt. Sicut igitur Pontificii ipsimet varias inter sese & discrepantes interpretandi regulas , & principia constituunt ; ita multo magis nostra ab ipsorum sive regula , sive regulis discrepabit.



IV.

καλασκευή  
ex  
2. Pet. I. 20.  
21.

§. 9. Nostram sententiam de genuino interpretandi vel explicandi ( hæc enim nunc pro Synonymis habemus ) scripturam principio & regula paucis quibusdam aphorismis includemus. Cum vero Scriptura sacra sit lucerna pedibus, & lumen semitis nostris Ps. CXIX. Ideoque dictum aliquod ipsius sequemur, quod nobis cynosuræ loco sit in probatione. Id vero est celeberrimum illud Petrinum oraculum, quod posteriore epistola capite I. v. 20. & 21. Apostolus scripsit, & ita sonat: τὸ τοῦ πρώτου γινώσκοντες, ὅτι πᾶσα προφητεία γραφῆς ἰδίᾳ ἐπιλύσεως ἐστὶν γίνεσθαι. ἐ γὰρ θελήματι ἀνθρώπου ἵνεχθῃ ποτὲ προφητεία, ἀλλ' ὑπὸ πνεύματι ὁ ἀγίος φερόμενος ἐλάλησεν ἄγιοι θεοὶ ἄνθρωποι, i. e. Hoc primum scientes, quod omnis prophetia scripturae propriae explanationis non sit; Non enim voluntate hominis allata est aliquando prophetia; sed à Spiritu Sancto lati locuti sunt sancti Dei homines. De quo nostra facimus verba præstantissimi epistolæ Interpretis, Dn. D. Gerhardi nostri p. m. comm. in l. c. p. m. 164. Nos dicimus, illum esse Spiritus Sancti sensum, qui ex verbis scripturae in sua nativa & propria significatione acceptis colligitur, quique congruit cujusque loci scopo: item antecedentibus & consequentibus, quique non pugnat cum fidei analogia, h. e. perpetua & constante scriptura sententia, in claris & perspicuis locis de singulis fidei articulis tradita, ac proinde scripturam ex scriptura interpretandam esse dicimus, &c. Sic ille.

Thesis I.

§. 10. Thesis I. Spiritus Sanctus solus est authenticus scripturae sacrae interpretes. Loquor de authentico interprete, i. e. eo, cujus explicatio infallibilis est à priori, nempe ideo, quod ipse sit ejus auctor, ita ut sufficiat ad probandum, genuinum hunc sensum esse, quia ipse dicit, eum esse genuinum. Talis interpretes solus Spiritus Sanctus est, nullus autem merus homo. Probatur ex 2. Pet. I. 20. & 21. cur enim scriptura sacra non est ἰδίᾳ ἐπιλύσεως? Quia prophetia voluntate humana non est aliquando allata, sed Spiritu Sancto inspirati locuti sunt sancti DEI homines: q. d. auctor scripturae est etiam auctor authenticæ interpretationis scripturae, quandoquidem optimus interpretes verborum est quisque suorum. Agnoverunt hoc principium veteres, quotiescunque scripturam explicaturi & ipsi Deum orarunt, & alios, ut pro sese apud Deum intercederent, sollicitarunt.

Atha-

Athanasius ardentem precatus est Deum, ut posset ἐν τῇ ἀνά-  
 γωσμαι νῦν λαβεῖν in lectione mentem seu sensum capere. t. 1. opp.  
 f. m. 994. B. Hilarii ad Deū oratio conceptis verbis exstat ab ipso-  
 met relata lib. I. de Trinit. fol. 12. D. Nobis enim, inquit, non infidelis  
 sponsionis istius auctor est, dicens: petite & dabitur vobis, querite &  
 invenietis, pulsate & aperietur vobis. &c. Et evestigio: nos qui-  
 dem inopes ea, quibus egemus, precabimur, & in scrutandis Prophe-  
 tarum tuorum Apostolorumq; dictis studium pervicax afferemus, &  
 omnes obserata intelligentia aditus pulsabimus: sed tuum est, &  
 oratum tribuere, & quasitum adesse, & patere pulsatum. Torpe-  
 mus enim quodam natura nostra pigra stupore, & ad res tuas intelli-  
 gendas intra ignorantia necessitatem ingenii nostri imbecillitate  
 cohibemur; sed doctrina tua studia ad sensum nos divina cognitio-  
 nis instituunt, & ultra naturalem opinionem fidei obedientia pro-  
 vehit. &c. Hieronymus, continuaturus expositionem Jesaia, ro-  
 gat Eustochoium suam, ut se in scripturarum explanatione certan-  
 te, ipsa cum Mose ad DEVM elevet manus. Præf. in comm. Jes. c. 3.  
 Hypothesis harum precum est nostra thesis, nempe, Spiritum  
 sanctum unicum esse sacrarum literarum interpretem infalli-  
 bilem.

§. II. Consequitur hinc, quod malus scripturæ inter-  
 pres sit omnis ille, qui in explicando non dependet à Spiritu san-  
 cto, ita ut ipsius explicatio sit conformis menti & explicationi  
 Spiritus sancti. Ratio est, quia talis alicujus interpretis, à Spi-  
 ritu sancto in explicando non dependentis, interpretatio est *id est*  
*propria*. Cujus scripturam sacram non esse, profitetur Petrus Apo-  
 stolus. Sive quis igitur persona sit publica, sive privata, Clericus  
 vel Laicus, Episcopus Romanus vel alius, unus vel plures, in  
 concilio, vel extra concilium existens, homo vel Angelus; Si  
 interpretatio ipsius non est conformis menti Spiritus sancti, sa-  
 cres amanuenses animanti, genuinus sensus non erit, nec catho-  
 licus, sed privatus. Confirmatur ex eo, quod Apostolus nullam  
 aliam rationem, cur sensus verus sit, ponat, quam inspirationem  
 divinam, nullum hominis statum, respectum, officium, locum,  
 tempus, quo quidem immediate influat in genuinam scripturæ  
 interpretationem.

§. 12. II. Spiritui sancto in percipiando, & docendo genui-  
 B no sen-

II.

*no sensu subordinantur homines* ἑυτακτοί. Sicut enim Spiritus sanctus olim Prophetis & Apostolis, & per hos aliis hominibus voluntatem divinam revelavit: ita hodie quoque hominibus quibusdam, & per hos aliis, sensum oraculorum divinorum offert & confert. Vult quidem omnibus hominibus notitiam sui sensus conferre; Non clericis solum, sed etiam laicis; Nam Petrus suas epistolas etiam Laicis inscripsit; Id tamen vult sub certo ordine, in quo hominem collocatum vult eum, qui sensum scripturæ genuinum sibi promittit. Probatur ex 2. Pet. I. 19. ubi commendat προσέχοντας τῷ λόγῳ προφητικῷ, *attendentes verbo Prophetico*, quæ προσοχή, sive *attentio*, tanquam explicatio & intuitio lucis hodogeticæ, præcedat diem agnitionis & veræ fidei, in cordibus attendentium exorientis: Sicut igitur, qui à lucerna in loco caliginoso lucente desiderat illuminari, opus habet applicatione & intuitione istius lucis, sive lucernæ, tanquam medii ad illuminandos oculos naturâ ordinati; Ita, qui lucem sensus divini, in tenebris hujus mundi radiantem, nosse vult, opus habet attentione, tanquam ordine divinitus constituto. Confirmatur manifeste ex connexione versiculorum 19. 20. 21. In vers. 19. Apostolus thesin ponit, bene facere eos, qui attendunt sermoni prophetico, donec dies agnitionis exoriatur in animis ipsorum; vers. 20. probat thesin ex eo, quod explicatio scripturæ non fiat ex arbitrio humano, sed (quod supplendum & subintelligendum est) ex divino: vers. 21. hoc ipsum probat ex eo, quod scriptura prophetica sit allata ex arbitrio non humano, sed divino, nempe ex inspiratione divina: Hinc argumentum: Quicumque in percipiendo divino scripturæ sensu homines alligavit ad προσοχήν, attentionem, tanquam ad intuitionem sermonis prophetici, lucernæ lucentis; ille vult eos constitutos esse in certa τάξει; Spiritus sanctus in percipiendo genuino scripturæ sensu homines alligavit ad προσοχήν &c. E. Spiritus sanctus homines constitutos vult in certa τάξει. Brevius: Quidquid pendet ex προσοχήν pendet ex τάξει; Explicatio scripturæ pendet ex προσοχήν. E. Explicatio scripturæ pendet ex τάξει.

III.

§. 13. III. *Pietas hominis magnum adfert momentum in percipiendo genuino sensu sacrarum literarum.* Probatur ex 2. Pet.

I. 19.



L. 19. ubi censet, καλῶς ποιεῖν, bene facere eos, qui ad verbum Propheticum respiciunt, tanquam ad lucernam lucentem in loco caliginoso: Bonum igitur opus faciunt, quicumque sacras literas in conspectu habent; cujus consequens est exortus dei, i. e. veræ agnitionis Christi. Suffragantur Patres, ad illud Jesai. VII. 9. Si non credideritis, non intelligetis; *diligentius*, inquit Eusebius, *vero attendere, par est, ipsius oraculi exordium, quod legentes admonet, si non crediderint, nec intellecturos quidem esse: Et sane adnotare necesse fuit, atque ostendere, quod non solum intellectu, sed etiam fide iis, qui lecturi sunt, opus sit; & vicissim, non solum fide, sed etiam intellectu.* &c. lib. VII. dem. Evangel. f. m. 315 B. Quæ & Hilarii sententia est, *intelligentia, dicentis, vera à DEO donum, fidei munus est, per quam infirmitas sensus gratiam revelationis mereatur.* &c. lib. XI. de Trinitat. fol. 174. Quorsum referenda est puritas mentis à præconceptis opinionibus liberæ; Sicut enim lucernam lucentem recte intueri non potest, qui ictero laborat; ita genuinum scripturæ sensum nec ille percipiet, qui erroribus pertinaciter præoccupatus est: *Ad scripturarum indaginem, verumque intellectum, opus est vita proba, animo puro, & virtute, quæ secundum Christum est, ut mens per ejus tramitem decurrens, ea, quæ expetit, adipisci possit, quatenus fas est, humanam naturam, quæ DEI verbi sunt, intelligere. Nam sine pura mente & vitæ sanctorum imitatione nemo comprehenderit sanctorum verba.* &c. verba sunt Athanasii de incarnat. verb. t. I. fol. 110. C. Quod si mens præoccupata fuerit, accidit, quod Optatus Milevitanus scribit: *Legisti quidem, sed ut se res habent, intelligere noluisse, studio criminandi ad convicium Catholicorum cuncta componens, multum ad arbitrium tuum destinare conatus es.* lib. V. advers. Parmen. pag. 130. & pag. 132. *Sensus suos invidia depravavit, & intelligendi tibi aditus clausit.* Hæc Optatus.

§. 14. IV. Ordo divinus requirit, ut in explicanda scriptura sacra ipsam adhibeamus & consulamus. Probatur thesis ex præmissis. Nam duo potissimum dicit Apostolus; Et (1.) quidem (si naturæ ordinem sequamur) *diem illucescentem, & exortum in cordibus nostris Luciferi;* i. e. genuinum scripturarum, & mysteriorum in ipsis contentorum, sensum, sicut ille in animis

IV.

legentium vel audientium agnoscitur: hic finis est, ad quem respiciendum est primo; & effectus, qui tandem sequitur. (2.) *Media*, quorum unum est proximum, alterum remotum. Proximum est *ἐπίλυσις explicatio* scripturæ, quippe quæ lucem illam applicat oculis animi nostri, ut videant claritatem verbi & sensus divini. Remotum est *προσοχή attentio* ad illud lumen; Uterque actus, & explicatio, & attentio versantur circa idem objectum, nempe uterque circa scripturam sacram, sed diversimode acceptam. *Ἐπίλυσις* scripturam habet pro thesauro concluso, quem reseat, ut oculis conspici, i. e. intelligi possit; *προσοχή* verò, seu attentio circa eandem quidem, sed ut lucem, quæ in loco caliginoso luget, & contemplanda est, ut lucem in oculis contemplantium accendat. Scriptura igitur & objectum est, quod declarandum; & medium, quo declaratio facienda est. Scripturæ interpretatio non fit ex arbitrio humano, sed divino; quare bene faciunt, qui prophetico verbo attendunt, utpote per quod tanquam lucernam accenditur dies clara intelligentiæ & agnitionis mysteriorum divinorum.

§. 15. Hanc thesin confirmat testimonio suo antiquitas, Athanasius orat. advers. gent. t. 1. f. 1. statuit: Scriptura ἀφ' ἑαυτῆς ἔχει τὸ γνώριμον, à se ipsa habet sui intelligentiam; Ejusdemque judicio absurdum, imo magnopere impium est, τοιαύτας ἔχουσας τῆς γραφῆς τὰς εἰκόνας, ἐξ ἄλλων ἡμῶς περὶ τοῦ κυρίου διανοεῖσθαι: cum scriptura habeat tales imagines, aliunde nos Dominum nosse: de decret. Synod. Nicæn. t. 1. f. 260. D. Præclare etiam Hilarius lib. 1. de Trin. fol. 7. disputat, optimus, inquit, lector est, qui dictorum intelligentiam expectat ex dictis potius, quam imponat; & retulerit magis, quam attulerit; neque cogat id videri dictis contineri, quod ante lectionem præsumpserit intelligendum. Cum itaque de rebus DEI erit sermo, concedamus cognitionem sui DEO, dictisque ejus pia veneratione famulemur. Idoneus enim sibi testis est, qui, nisi per, se cognitus non est. Et lib. IX. f. m. 118. Apostolicam fidem seculi homo non capit, & sensus sui dicta alius, præterquam ipsius sermo, non explicat. & comm. in Matth. can. 7. f. 267. Non nos intelligentiam fingimus, sed gesta ipsa nobis intelligentiam impertiuntur; Neque enim res intelligentia, sed rei intelligentia subsecundat. Quæ omnia eo tendunt, quod scriptura ex scriptura sit explicanda.

§. 16. V. Thesis: *In explicanda scriptura sacra ex se-  
ipſa, reſpiciendum eſt ad fontes, ſeu linguas originales, in quibus  
verbum Dei primum inſpiratum eſt.* Colligere hanc theſin licet  
ex eodem dicto Petrino. Dum enim propriam removet ἐπιλυ-  
σιν Apoſtolus, eam reddit cauſſam, quod prophetia non ſit alla-  
ta ex voluntate humana, ſed divina, quippe quod ſancti DEI  
homines locuti ſint ex inſtinctu Spiritus ſancti. Inſtituenda igitur  
eſt interpretatio ſecundū loquelam Prophetarum, ea vero fuit  
Hebræa in V. T. ſicut Græca eſt Apoſtolorum in N. T. Et ratio ipſa  
hoc ſuadet, (ſuppoſito, fontes eſſe Hebræos, & Græcos,) quod ex  
his linguis explicatio inſtituenda ſit: primum enim in his Idio-  
matibus verbum DEI propoſitum eſt; primum autem in uno  
quovis genere eſt meſura reliquorum; Eusebius Cæſar. dem.  
Evang. lib. VI. cap. 20. explicans vaticinium Jeſaiæ urget literam  
Hebræam: ὅτι γὰρ ἔχεν φωνὴ τὴν Ἑβραίων φωνὴν: λεγέτωσαν  
διὶ τα Ἑβραίων παῖδες: *Sic enim habere ajunt Hebraicam vocem;*  
*Dicant ergo Hebraei &c.* Hieronymus omnium frequentiffime hoc  
urget, & ipſe exercuit: *Neceſſitate compellimur, ait, ut crebrius,  
quam volumus, de verbis Hebraicis differamus; Nec enim poſſumus  
ſcire ſenſum, niſi cum per verba diſcamus, &c.* Comm. in Eccleſ. t.  
VII. c. 1. fol. m. 32. D. Ad Vitalem ſcribit, *ſe ad Hebraicam ve-  
ritatem tanquam ad arcem confugere;* Et in cap. 8. Zachar. Cogi-  
mur, inquit, *ad Hebræos recurrere, & ſcientia veritatem de fonte  
magis, quam de rivulis, quarere.* Confer Apol. adverſ. Ruffin.  
t. 3. fol. 103. D.

§. 17. VI. Thesis: *Scriptura invicem conferenda ſunt,  
adeoque etiam V. T. & N. Testamentum.* Inſinuat hanc regulam  
Petrus verſ. 16. collato cum verſ. 19. 20. 21. Nam verſ. 16. men-  
tionem facit Evangelii à ſeſe prædicati, & revelati, illudque  
confirmat cum ab ἐντολίᾳ, quod ipſe, & collegæ vidiffent glo-  
riam Chriſti in monte, Mātth. XVII. 1. ſeqq. tum ab auditu,  
quo percepiſſent vocem Patris é Cælo ſonantis, de Filio ſibi di-  
lecto, & audiendo; præcipuè autem à verbo prophetico, iſtis om-  
nibus firmiore, & idoneo, quo corda illuminentur vera  
Meſſiæ agnitione. Conſert igitur complementum Novi Testa-  
menti cum verbo Veteris Testamenti, & hoc quidem pro lucer-  
na habet, per quam corda ad intelligentiam myſteriorum divi-

V.

VI.



norum, in scripturis contentorum illuminentur. *Hunc morem refert Hieronymus, habeo, ut quotiescunque ab Apostolis de veteri instrumento aliquid sumitur, recurram ad originales libros, & diligenter inspiciam, quomodo in suis locis scripta sint.* &c. Comm. in c. III. Epist. ad Gal. f. m. 86. F. Et præfat. quæst. ad Hedib. t. IV. fol. m. 62. D. *Abyssus, ait, Veteris Testamenti invocat abyssum Evangelicam, & quasi exauditur, instituta collatione: Hanc methodum cum spernant Judæi, mirum non est ad genuinum scripturæ sensum eos non pervenire: Habent Iudæi panem, sed absque fortitudine; habent aquas, sed absque robore; Legunt enim scripturas, sed non intelligunt; Tenent membranas, & Christum, qui in membranis scriptus est, perdidit.* &c. Ita idem Hieron. comm. in Jes. III. 1. f. m. 8.

VII.

§. 18. Nec insuper habenda sunt (quæ VII. Thesis est) *antecedentia & consequentia textus*. Elicimus regulam ex respectu veteris & novi Testamenti; istud præcessit, hoc insecutum est. Utrumque confert Apostolus, quia in veteri prædictum est, quod in novo impletum est: sic interdum antecedentia sequentibus facem præferunt, ut præfert hodogeta faculam iter facienti, ut viam inveniat. Ad antecedentia respiciendum est, exemplo Hieronymi, *legamus, inquentis, paulo superius, & sic ad hac verba veniamus, ne de extremis partibus, & ut ita dicam, cauda capituli, totam sententiam nosse cupiamus.* &c. R. ad 2. quæst. Amandi, t. IV. fol. 60. B. Et R. ad quæst. XI. Hedibæ, fol. 68. A. *Totum loci huius (2. Cor. 11. 15. 16.) Capitulum proponamus, ut ex præcedentibus & sequentibus possint intelligi media, quæ ex utroque contexta sunt.* Ad consequentia: ἀνάγνωτε δὲ καὶ τὴν ἀκολουθίαν τῶν ρημάτων, *legite vero etiam consequentiam verborum, ait Athanasius ad Arianos orat. II. adv. ipsos f. m. 317. D. Et ad Arium: Erit tibi liquidissimus istius loci intellectus, si in manus sumas Prophetam, & sequentia legas (ἐκ τῶν ἐπομένων, ex consequentibus.) disput. f. 143. C. Suffragatur Hilarius, dicens: intelligentiam sensuum in consequentibus requiramus, lib. VII. de Trinit. f. 93. Atque ita, ut summam complectamur, dictorum intelligentia aut ex præpositis, aut ex consequentibus expectetur: eodem promittente lib. IX. f. m. 118.*

VIII.

§. 19. Thesis VIII. *Analogia fidei, & scopus dictorum studiose*

*diſe attendendus eſt.* Colligitur ex 2. Petr. I. 16. Ubi Apoſto-  
lus refert, quod annunciarit ſuis auditoribus *virtutem & adven-  
tum Domini noſtri Ieſu Chriſti, cujus ipſius gloriam viderit.* Chri-  
ſtus enim eſt ſcopus totius ſcripturæ; legis, utpote quæ pæda-  
gogus fuit in Chriſtum; & Evangelii, cujus centrum eſt, in  
quod omnia oracula reſpiciunt. Quare is demum recte expli-  
cuerit ſcripturam, qui ad Chriſtum eam tandem retulerit. Con-  
fer I. Pet. I. 10. I. 12. Act. X. 43. Rom. X. 4. Præclare Hila-  
rius: *omne dictum ut dicatur ex cauſſa eſt, & dicti ratio ex ſenſu e-  
rit intelligenda dicentis* &c. lib. II. de Trin. f. 21. Et lib. IV. de Trin.  
f. 37. *Sequamur adverſus irreligioſas & impias de DEO inſtitutio-  
nes, ipſas illas divinorum dictorum auctoritates, & unumquodque  
eorum ipſo, de quo quaritur, auctore tractabimus.* &c. Eandem re-  
gulam inculcat etiam Baſilius lib. I. de Bapt. cap. 2. t. I. fol. 649. A.  
Et nominum, inquiens, & verborum, ac rerum uſum; in divinitus  
tradita ſcriptura, de DEO, & de Chriſto ipſius, in ſanctis Prophetis,  
Evangelis, & Apoſtoliſ, non utcunque, ac remere, pro communi con-  
ſuetudine accipiendum, ἀλλὰ δεδοκιμασμένως ἐν ἀγίῳ πνεύματι,  
πρὸς τὸν Κροτὸν τῆς εὐσεβείας φρονήσεως, sed ut à Spiritu ſancto decre-  
tum eſt, ad ſcopum piæ ſententiæ, idque non univerſaliter, sed ex  
parte, καὶ καθ' ὅσον ἂν ἕκαστον Συμβάλλεται τῷ προκειμένῳ ὕγι  
λόγῳ, Et quatenus unumquodque ad propositum ſana doctrina fa-  
cit, & piæ ſentiendum, & mentem ad iudiciorum ac decretorum  
pietatis cognitionem inducendam eſſe iudico. Hæc ille. Congruit  
his, quæ Hilarius in clave ad Pſalmum primum notavit: Prin-  
cipaliter hæc in Pſalmis intelligentia eſt, dicens; ex cuius perſona,  
vel in quem, ea, quæ dicta ſunt, intelligi oporteat, poſſe diſcernere.  
f. m. 338.

§ 20. Theſis IX. Pontificiorum regula bermenentica eſt  
ἡ γραφή Scriptura regulam ſui interpretatricem neſcit aliam,  
quam ſeipſam, utpote quæ ſola divinitus inſpirata eſt; Quare,  
cum verbum ab Eccleſia, ſive Patribus, utut ſcientiſſimis,  
prolatum, non ſit immediatè divinitus inſpiratum, etiam re-  
gula interpretandi infallibilis non erit, neque à ſcriptura appro-  
bata. Eccleſia, cuius mentionem Tridentini ſeſſione IV. faci-  
unt, aut intelligitur Catholica, aut Romana, aut huius caput  
Pontifex; Catholica non poteſt intelligi, cum de hac non con-  
ſer.

IX.

Ἀνασκη.

stet, quem de difficilioribus scripturæ dictis tenuerit, vel teneat, sensum; Neque Romana potest intelligi; Nam neque hæc scripturam communi iudicio uspiam exposuit; Neque moraliter possibile est, hanc, vel istam, dubio aliquo scripturæ dicto, convocare, ad sententiam ferendam, vel audire scripturas explicantem; Quare aut concilium fuerit, aut Papa Romanus, interpretes; sed neutri scriptura infallibilem sui interpretationem legitur commisisse; Non concilio: secus Hieronymus ausus non fuisset repudiare explicationem loci Tit. I. 6. de unius uxoris i. e. Ecclesiæ marito Episcopo, factam à Patribus Nicænis, scribens: *Quidam coactè interpretantur, uxores, pro Ecclesis, viros pro Episcopis debere accipi: Et hoc in Nicæna quoque Synodo à Patribus esse decretum, ne de alia ad aliam Ecclesiam Episcopus transferatur &c.* Transeo eos, qui ex Pontificiis contendunt, concilium, secluso papa, esse fallibile, etiam in quæstionibus fidei, adeoque & in interpretandis scripturis; Nec Papæ Romano; Neque enim hactenus argumentis invictis ostensum est, quod ille à reliqua hominum, & clericorum etiam, sorte ita exemptus fuerit, ut in explicanda scriptura sacra errare non possit,

§. 21. Si autem regula ista ἀνταρῶς est, fidem divinam non meretur: *Quod aperte scripturarum auctoritate non didici, quasi secretum prætereo:* ait Ambros. lib. III. hexaem. c. 3. Et cum de explicando loco Matth. XIII. 35. quis Zacharias ille sit, ageret Hieronymus, & quidam explicationem, nescio quam, ex traditione adferrent, tanquam fuisset Johannis Baptistæ pater, inter templum & altare occisus, Hieronymus iudicium suum hoc dedit: *Hoc, quia de scripturis non habet auctoritatem, eadem facilitate contemnitur, qua probatur. &c.* Innuens, nisi expositio fundamentum in scripturis habeat, frustra & incertam esse. f. 34. F. Idem adversus Helvidium disputans t. 3. f. 6. A. de quæstione: An B. Maria virgo post partum Josepho nupserit? quod Helvidius ex Matth. I. 25. probare satagebat, respondet: *Uti hec, quæ scripta sunt, non negamus, ita ea, quæ non sunt scripta renuimus. Natum Deum esse de virgine, credimus, quia legimus; Mariam nupsisse post partum, non credimus, quia non legimus.* Sic ille, ex eadem hypothesi, non obligari nos interpretatione scripturarum, nisi ea, quam ipsa scriptura prodit.



§. 22. *Thesis X. Regula Tridentina est ἀντιπαρῶς*. Scriptura Petrina dicit, explicationem scriptorum Prophetico-  
rum, i.e. ipsius scripturæ sacræ, non esse privatā; Contra dicere cogitur regula Tridentina, esse aliquando privatam, nempe tum, cum Ecclesiæ quidem, i.e. Papæ, vel Patrum consentientium est, menti tamen Spiritus sancti & scripturæ ipsius conformis non est. Talis vero tum est, cum Pontifex Romanus Hæreticus est, & Hæreticæ scripturam sacram exponit. Possè autem Pontificem Romanum esse Hæreticum, imo revera fuisse, præter alia probatur exemplo Honorii, qui seculo VII. ab anno 626. usq; ad an. 639. i.e. annos XII. & aliquot amplius menses sedit: Is enim Monotheletarum hæresi sese mancipaverat, & propterea à *sexta Synodo Generali Constantinopolitana tertia*, ( quam vocat Bellarm. chronol. p. 69. ) Constantino Pogonato Imperatore, celebrata, anathemate percussus est: Verba Synodi sunt hæc: *Anathematizamus Theodorum, qui fuit Episcopus Pharam, & Sergium, & Pyrrhum, & Paulum, ac Petrum, impios præfules Constantinopolitanorum Ecclesiæ, atque cum eis HONORIUM ROMÆ, una cum Cyrillo Alexandria, nec non & Macarium Antiochia, ac discipulum ejus Stephanum, qui mala opinionis Apollinarii, & Eutychetis, & Severi Impiorum Hæresiarcharum, dogmata sectantes, sine operatione ac sine voluntate animatam anima rationali & intellectuuali Dei carnem, sensibus lafis, & revera sine ratione, predicaverunt.* Sic Synodus fulminat adversus Romanum Episcopum, præsentibus, assidentibus, subscribentibus Episcopi Romani legatis tribus, Donato Ostiensi Episcopo, Marino Romanæ Ecclesiæ Diacono, & Stephano Nepefino Episcopo.

§. 23. Curiales Theologi Pontificii, Pighius, Baronius, Bellarminus, & alii, cum verba Synodi, utpote clarissima, in alienum sensum detorquere non possent, gladio nodum hunc Gordium secare audent, dicentes, acta Synodi esse vitiata; ut & Leonis II. Episcopi Romani Epistolas, in quibus de ista Honorii hæresi aperte scripsit: sed quam vanum sit, & pudendum, hoc effugium, docuit nuper Joannes Launojus, Theologus Parisiensis, & Romanæ Ecclesiæ addictus, in literis, quas Lutetiæ Parisiorum Anno Christi M. DC. LXIV. 4. Kal. Quintileis ad Raimundum Formentinum, Parisiensem itidem Theologum

X.

P. R. Hæreticus.

juxta Synodum VI.

Exceptiones curialium:

diluuntur per Launojum.

AL. ep. 139.

perſcriptis: *Legati*, inquit, *ij non erant utique, qui præter mentem, præter voluntatem, præter ſedis Apoſtolice traditionem aliquid ederent, & in medium profferrent. Noverant, Agathonis legatos, cum reverſi ſunt Romam, ac Synodi acta perlegerunt, Leoni II. & Leo II. illa vertiſſet in Latinum, de actorum corruptione conqueſtos non eſſe. At ſi facta fuiſſet ulla corruptio, nonne apud Imperatorem Conſtantinum, qui Synodum convocaverat, tanto cum ſtudio interfueraſſet, & ſubſcripſeraſſet, de vi actus illata, de injuria Honorio per falſarios irrogata, conqueſti fuiſſent? Conqueſti non ſunt. Occidentales reliqui antiſtites tacuerunt. Quis autem ſciens & prudens Agathonis legatis, quorum unus poſtea fuit Ioannes V. quis Occidentalibus Episcopis, qui Synodo interfueraſſent, exitioſum Honorio, ſedi Apoſtolice, veritati ſilentium impropiaſſet? Impropiaſſet merito, ſi acta Synodi fuiſſent corrupta! Quis illos omnes & Legatos & Occidentales Episcopos publice cauſæ pravaricatores appellaret? Appellari jure poſſent, ſi de actorum vitiatione, & de non errandi privilegio, quod haberet Honorius, tacuiſſent. Hæc ille, quæ confirmat dictis aliquot Pontificum Romanorum, nempe Cœleſtini in epiſtola ad Galliarum Episcopos; Felicis III. in epiſt. I. ad Acacium conſtant. Gregorii VII. in lib. IV. epiſt. I. Urbani II. ad Remenſem & Comprovinciales Episcopos.*

Et  
Parificenſes  
alios;

§. 24. Secutus eſt in hoc Launojus ſuos parochos & Theologos Pariſinos, in ſcripto, cui titulus: *Nova Hæreſis Jeſuitarum, deſenſa publicè Pariſiis in Collegio Claromontano, Theſibus impreſſis d. 12. Decembr. 1651. denunciata univerſis Episcopis Gallia: Nova illa Jeſuitarum hæreſis erat Theſis ipſorum XIX, hæc: Papam, quoties ex Cathedra loquitur, eandem habere inſallibilitatem, quam habuit Jeſus Chriſtus, non ſolum in queſtionibus juris, ſed etiam facti, &c. Temerariam hanc Jeſuitarum ſententiam ut confunderent Galli, objecerunt ipſis Honorii, tanquam Hæretici, Episcopos Romani, exemplum, & quia noverant, excipi, acta, ut & literas Leonis II. eſſe corruptas; reſponderunt: Ne quicquam hic juvat recurrere ad prætenſam falſationem Actorum Concilii VI. & epiſtolarum Leonis II. Quemadmodum enim hæc exceptio eſt plane improbabilis, ridicula, & aliena, prout ipſi Episcopos, etiam qui Jeſuitæ erant faventiſſimi, in poſtremo Clericorum conventu*

ventu id agnoverunt, ita præter miserum hoc remedium, nihil afferri potest, quo minus fide divina credatur, Honorium justè anathemate fuisse percussum, & literas ejus tanquam plenas hæresium justè esse condemnatas: imo sensui communi renunciassè eum dixeris, qui aliter de hoc Papa senserit, aut epistolas ejus non habeat pro hæreticis. Hoc illi.

§. 25. Excipiunt porro *adulatricis curiæ Magistri*, (ita dictus Launojus ipsos vocat) Papam tum demum esse infallibilem, cum ex cathedra definit; Honorium autem, cum literas in favorem Monotheletarum scriberet, ex Cathedra non definivisse; Sed reclamant Parisienses, iterum scribentes: *Loquebatur enim ut iudex controversiarum fidei, ut componeret gravissimam contentionem, quæ vigeat tunc in Ecclesia, quæque universos Orientis Patriarchas diviserat.*

Exceptiones.

§. 26. In præmissis Jesuitas suo ipsorummet gladio jugulant; Si enim infallibilis est Papa, cum ex Cathedra definit, etiam infallibilis erit in suis epistolis Leo II, quibus defini vit, Honorium fuisse Hæreticum; eorum verba hæc sunt: *Atque ita nemo dubitare potest, Papam Leonem II. locutum esse ex Cathedra, quando in aliquot suis Epistolis pro confirmatione Concilii VI. Oecumenici promulgatis, in specie confirmavit condemnationem Honorii, ipsique anathema dixit: Quia Apostolicam Ecclesiam (ita sonant verba.) non Apostolicæ traditionis doctrina lustravit, sed profana traditione immaculâri permisit. Atque per consequens, si Pontifices tum, quando loquuntur ex Cathedra, de quacunque id sit materia, sive juris, sive facti, eandem possident infallibilitatem, quam habuit Iesus Christus; sicque omne id, quod tunc pronunciant, est articulus fidei; erit etiam omnino articulus fidei, quod literæ Honorii sint hæretica, quodque is, qui id negat, posita regula universali, habeat certissimam Hæreticorum notam, quæ est, juxta S. Paulum, proprio suomet iudicio condemnari.* Qui plura velit de illa ex Cathedra definitione nosse, adeat Johannem Launojum in literis ad Martinum Metayerum Parisiensem Theologum Luteriæ Paris. nonis Sextilibus Anno M. DC. LXV. Ebroidas missis.

§. 27. Judicium Synodi Constantinopolitanæ Sextæ confirmavit alia *ἀγία καὶ οἰκουμενική, sancta & universalis Synodus*

Suffragium  
Concilii  
Trullani.



dus Constantinopolitana, ea nimirum, quæ in Trullo habita est. Illa enim in prosphonetico ad Justinianum Imp. Honorium Romæ Episcopū refert, τὸ ἐνθὲς τῆς ἀληθείας δόγμα παρακχεῖσθαι, *rectum veritatis decretum adulteravisse*; Illud vero ad ipsum fidei fundamentum pertinebat; Erat enim hoc : δύο εἶναι φυσικὰς θελήσεις, ἥτοι θελήματα, καὶ δύο φυσικὰς ἐνεργείας, ἐπὶ τῆς ἐνσάρκου οἰκονομίας τῆ ἐνὸς κυρίου ἡμῶν ἰησοῦ χριστοῦ, τῆ ἀληθινῆς Θεοῦ : *Duas esse naturales voluntates, & duas naturales operationes, incarnato unico Domino nostro Iesu Christo, vero DEO.* Hoc sanctissimum dogma adulterasse ajunt Honorium, statuendo, ἐν θελήματι, καὶ μίαν ἐνέργειαν ἐπὶ τῆ ἐνὸς κυρίου τῆ Θεοῦ ἡμῶν ἰησοῦ χριστοῦ : *Vnam voluntatem, & unam operationem (efficacitatem) esse in unico Domino Deo nostro.*

Exempla.

§. 28. Fuissent igitur explicanda scripturæ dicta : Joh. V. 17. cum Christus ait : *Pater meus usque modo operatur, & ego operor* ; item Luc. XXII. 42. ubi idem dicit : *non mea (pater) sed tua fiat voluntas* : Quæso, quo sensu Monotheleta Honorius, Ecclesiæ Romanæ caput, & os, & oculus illa exposuisset? annon ad mentem hæresis Eutychianæ, non aliam intelligendo humanæ naturæ, quam divinæ, ἐνέργειαν naturalem; nec aliam ejusdem voluntatem naturalem, quam divinam, quippe humana natura, vel certe ejus proprietatibus, in divinam naturā, & ejus proprietates omnino conversis. Hiccinē vero sensus fuisset ille à Spiritu S. in dictis istis intentus, & Ecclesiæ ad credendum propositus? Id vero ne ipsi quidem Pontificii dixerint; Fuisset igitur ἰδιώτης Honorii, ab ejus antecessore, scilicet, Petro rejecta; & tamen ex hypothēsi Tridentina amplectenda, utpote à *sancta matre Ecclesia*, i. e. papa Romano ex Cathedra definita.

XI.

§. 29. Thesis XI. *Regula Tridentina Pontificiis ipsis est contraria.* Probatur ex præmissis : unanimi enim consensu Patrum Constantinopolitani utriusq; Concilii, & eorum, qui vel olim, vel hodie decreta & sententias utriusq; venerantur, Honorius fuit Hæreticus, & Hæreticæ ejus in scripturam explicationes, saltem nonnullæ; Si credendum est patribus, quando unanimi consensu aliquot scripturæ dictum explicant; cur non credendum illis in tantis conciliis congregatis fuerit, cum referunt, Honorium fuisse Hæreticum, i. e. Pontificem Romanum posse esse

esse Hæreticum, & scripturam Hæreticè explicare; Neque solus est Honorius, sed plures habuit Collegas Hæreticos, qui & ipsi sicut in articulis fidei, ita in interpretandis scripturis sacris errarunt. Juvat audire unicum Hadrianum, olim Professore Lovaniensem, postea Pontificem Romanum, Sextum ejus nominis; qui artic. III. de ministro confirmationis ita statuit: *Dico, quod si per Romanam Ecclesiam intelligatur caput ipsius, Romanus Pontifex, certum est, quod possit errare, etiam in iis, quæ tangunt fidem, hæresin per suam determinationem, aut decretalem, asserendo. Plures enim fuerunt Pontifices Romani hæretici; Item & novissimè fertur de Joanne XXII. &c.* Sic ille statuit, qui ex Professore Episcopus Romanus evasit, nec uspiam legitur sententiam suam retractasse.

§. 30. Eam Johannis XXII. sententiam damnavit Sacrosancta Romana Ecclesia, uti scribit Clemens IV. P. R. in epistola ad Palæologum Græcorum Imp. anno M. CC. LXVII. missa; & præterea Theologi Parisienses, uti refert Joannes Gerfo, Parisiensis Cancellarius, in sermone de festo Paschatis, explicans illud Christi ad latronem: *Hodie mecum eris in paradiso*: refert enim: *propter quod insuper apparet falsitas doctrinae Papæ Johannis XXII. quæ damnata fuit cum sono buccinarum vel tubarum coram Rege Philippo avunculo suo per Theologos Parisienses de visione beata, & credidit potius Theologos Parisienses, quam Curia. &c.* Observa, quod Cancellarius de verbis Christi, Luc. XXIII. 43. dicit, exinde probari, quod animæ fidelium statim perveniant ad visionem Dei beatificam, contra sententiam Pontificis Romani, adeoque etiam contra interpretationem ejus ad illa Christi verba.

§. 31. Exstant quorundam scripturæ dictorum explanationes, & quidem à præcipuis Patribus factæ, sic, ut stylo Tridentino ex *unanimitate* ipsorum *consensu* profectæ possint dici, quæ tamen ad palatum Curia saltem Romanæ non sunt. Sumamus dicta illa, quibus vulgo solent superstruere infallibilitatem, indeficibilitatem, auctoritatem, & eminentiam sui Pontificis Pontificii. Matth. XVI. 18. Christus Petro ait: *Tu es Petrus, & super hanc petram adificabo Ecclesiam meam, & porta inferi non adversus eam non prevalebunt.* Luc. XXII. 32. idem eidem

Exempla dictorum à Patribus expostorum.

dicat : *Oravi pro te, Petre, ne deficeret fides tua.* Apud Johannem c. XXI. 15. eundem Christus alloquitur, præcipiens : *pascere oves meas.* Quomodo hæc dicta patres unanimi consensu explicent, videamus.

<p>I. Matth. XVI. 18. expositum de Petro :</p> <p>de Apostolis o- mnibus.</p> <p>de fide.</p>	<p>§. 32. Dictum Matth. XVI. Patrum alii explicant de Petro, ut Tertul. de præscript. c. 22. de monog. c. 7. Origenes homil. 5. in Exod. in c. 17. Matth. Lib. V. in epist. ad Rom. apud Euseb. lib. VI. hist. c. 19. Cyprianus epist. LXX. &amp; LXXXIII. Lib. de unit. Ecclesiæ ; Firmilianus epist. ad Cyprian. Hilarius can. XVI. in Matth. &amp; in Psalm. CXXXI. Basilii in cap. II. Jes. Ambrosius serm. XLVIII. Epiphanius in Ancorato ; Gregorius Naz. orat. XXVI. Hieronymus in cap. XVI. Matthæi, &amp; Epist. LVII. ad Damas. Epist. ad Marcellam ; Augustinus lib. I. Retract. c. 21. Cyrillus Alex. lib. II. in Joh. c. 12. Leo I. epist. 75. Maximus Taurinensis homil. I. in Natali Petri &amp; Pauli ; Pselus in c. 5. Cantic. Theophylactus in c. XVI. Matthæi ; Euthymius in l. c. Matthæi. Alii de omnibus Apostolis, eorumque successoribus, ut Origenes tract. I. in cap. XVI. Matthæi ; Cyprianus epist. XXVII. Hieronymus in lib. I. contr. Jovin. &amp; in Psalm. LXXXVI. Augustinus in concione II. super Psalm. 30. &amp; in Psalm. 86. &amp; in epist. CLXV. Theodoretus in Psalm. LXXXVI. In cap. XLIII. Ezech. Ambrosius Anspertus lib. III. IV. V. &amp; VII. in Apocal. Etherius &amp; Beatus lib. I. contr. Elipand. Paschasius Radbertus lib. IV. in Matth. Alii de fide Petri : ut Eusebius Alex. homil. de resurrect. Hilarius lib. VI. de Trinit. Gregorius Nyssenus de Adv. Domini ; Ambrosius lib. VI. super Lucam, c. 9. &amp; in cap. II. ad Ephes. Chrysostomus homil. LV. &amp; LXXXIII. in Matth. &amp; in cap. I. Galat. Augustinus tract. VII. in Joh. &amp; tr. CXXIII. &amp; serm. XIII. in cap. I. Matth. Acacius in concil. Ephes. c. 7. part. 3. Cyrillus Alex. lib. IV. in Jes. orat. II. lib. IV. de Trinit. Juvenalis in literis ad Presb. &amp; Archimand. Leo I. serm. II. &amp; III. de assumpt. de transfig. Dom. serm. II. de nat. Apost. Petrus Chrysologus serm. LIII. &amp; LXXIV. Theodoretus epist. LXXVII. ad Eulal. &amp; CXLVI. ad Joannem Oeconomum ; Scriptor Anonymus in catena Nicetæ super Matth. Eucherius Lugd. homil. de Natali Petri, Felix Papa III. epist. 5. Hormisda Papa in Commonitorio ; Anastasius Patriarcha An-</p>
---	---



cha Antioch. lib. II. anagog. Gregorius I. lib. III. epist. 33. Isidorus Hispal. lib. VII. Origin. c. 9. Beda quæst. in Exod. c. 42. homil. de S. Petro : De feria III. palm. in cap. XXI. Joh. Joannes Damascenus orat. de transfigur. Hadrianus I. P. R. in epistola quæ act. II. Synodi septimæ lecta, & ad Episcopos Hispaniæ; Foro-Julienſi concilium à Paulino Aquilei. habitum. Christianus Drutmarus in expos. Matth. c. 35. Jonas Aurel. lib. III. de cult. Imag. Hincmarus Remensis opusc. XXXIII. c. 5. & 45. & apud Flodoardum lib. III. hist. c. 13. Nicolaus I. epist. II. ad Michael. Imp. & epist. VI. ad Photium; Joannes VIII. epist. LXXVII. Theophanes Cerameus homil. XLV. Theodorus Abucara epist. Orthod. Stephanus VI. epist. II. Troslejan. concil. can. 15. Odo Cluniacens. serm. de cathed. Petr. Rupertus Tuitiensis lib. III. super Matth. & XII. in Apocal. Innocentius II. epist. ad Episcopos. Senon. concilii. Hadrianus IV. epist. ad Freder. Imp. Urbanus III. epist. ad Archiepp. Cæsarius Cisterciens. homil. de cathed. Petri. Thomas Aquinas in suppl. q. XXV. artic. 1. Stephanus Parisiensis & Facultas Theol. Paris. in literis pro Thoma Aquinate; Alphonsus Toſtatus q. 67. in cap. XVI. Matth. Jodocus Chictroveus contra Lutheran. assert. c. 1. Joannes Eckius lib. I. de prim. papæ. c. 13. Renatus Benedictus Paris. Panopl. Ecclesia Romana in orat. festi Leonis II. De Christo exponunt Hieron. in cap. 7. Matth. Augustinus lib. I. Retract. c. 21. & serm. XIII. in Matth. c. 1. & II. Theodoretus in I. Cor. Beda in c. XVI. Matth. Paulinus Aquilei. lib. I. contr. Felic. Dungalus Diaconus contra Claudium Taurin. Rabanus Maurus lib. IV. de univ. c. 1. Anselmus in cap. XVI. Matth. Lombardus in c. II. epist. ad Ephes. Joannes Saresb. epist. 166. Goffridus Viterb. chron. part. XVI. Cælestinus III. epist. XIV. Innocentius III. in serm. II. de consecr. Cæsarius Cisterc. homil. de Cath. Petri. Thomas in supplem. q. 6. artic. 6. & in c. IV. 1. ad Corinth. Pius II. lib. I. de gest. Basil. Concil. ii.

de  
Christo.

§. 33. Joannes Launojus in literis ad Gulielmum Voë-ellum Parisiensem Theologum fere ante hoc decennium missis, conatur enumeratas expositiones Patrum & conciliorum inter sese conciliare, quoad tamen fieri licet, ut ipse profiteatur pag. 46. Ait, patres plerosque primæ sententiæ secundam non excludere, sed

Expenditur.

sed includere ; quandoquidem nonnulli ipsorum secundam etiam suam fecerint ; reliqui vero ex aliorum , quibuscum vixerunt , communione in alias expositiones traduci possint p. 50. Porro , expositionis quarta auctores cum auctoribus expositionis tertia sine difficultate ulla conciliari possunt , ut ex illorum verbis colligitur . Nam pene sunt idem , super Christum , & super Christi confessionem à Petro editam fundari Ecclesiam ; quidquid id est , ad unam Christi personam refertur . &c. Subjungit συμπέρασμα : In summa , inquit , postquam expositionis prima auctores , qui cum aliarum expositionum auctoribus conciliari postulant , conciliati sunt , auctores expositionis secundæ , nisi auctores primæ numero superent , in aequalitatem cum illa veniunt , & ab auctoribus expositionis tertiæ & quartæ , quæ nihil , aut parum , inter se differunt , omnino vincantur &c. Id quod ex tribus potissimum colligit , ex compositione auctorum inter se ; Ex Jona Aurel. qui expositionem tertiam tractatoribus Ecclesia pene omnibus tribuat ; & ex Joanne Eckio , qui dicat , eam ( tertiam expositionem ) à nemine negari ; quod ille dixerit eo maxime tempore , nempe Lutheri , quo minime omnium dicendum fuisset , nisi veritas cœgisset ; Ea enim sententia seu expositio omnium fere Lutheranorum communis est , teste Bellar. lib. I. de P. R. c. 10. Lutheranorum igitur expositio ea est , quæ pro sese habet unanimem patrum consensum , ab expositione Pontificiâ dissentientem , quippe quæ de persona Petri , & ejus in sede Romana successoribus exponit .

II.

Luc. XXII. 32.

I.

Expositio

§. 34. Dictum alterum est Luc. XXII. 32. Hujus quoque diversæ Patrum expositiones occurrunt ; & I. quidem eorum maximè , qui docent , Dominum orasse hoc loco pro perseverantia solius Petri in gratia Dei usque ad finem , referente Bellarmino lib. IV. de P. R. c. 3. Hanc ait esse expositionem quorundam , qui hoc tempore vivunt , i. e. recentiorum ; sed dissimulat , etiam Veterum eam esse , & plerorumque quidem , præcipuorumque , seu , ut cum Joh. Launojo loquamur , expositionem hanc esse antiquorum Patrum Ecclesia , eamque per traditionem venisse ad illud usque tempus , quo scribebat : epist. ad Bevillaq. p. 61. quam & ipse amplectitur , quod in ea scripturæ sensus ad literam exprimitur . p. 78. Est autem ea expositio Tertulliani de fug. in per.

in perfec. c. II. *Cypriani* epist. VIII. & de orat. Domin. *Hilarii* Picav. lib. II. de Trinit. *Basilii* Cæsare: Episc. homil. XXII. de humil. *Ambrosii* Mediolanens. in Lucæ cap. XXII. & in Psalm. XLIII. *Ioannis Chrysostomi* homil. LXIII; & homil. de verbis Jerem. c. X. & homil. LXXXIII. super Matth. apud Nicetam in caten: Matth. XXVI. *Carthaginensis concilii* in epist. ad Innocentium P. R. *Innocentii* I. in epist. ad Concil. Carthag. *Milevitani Concilii* ad Innocent. I. Iterum *Innocentii* ad Milevitanum hoc concilium; *Palladii* Helenopolitani in dialogo de vita Chrysostomi; *Augustini* epist. CCLII; de corrept. & grat. c. 6. 8. 12; Comment. in Psalm. CVIII. CXVIII. Conc. XV. lib. II. contr. Julian. c. 217. *Auctoris* qq. ex N. T. quæst. LXXV; *Cyrilli Alexand.* lib. XI. sup. Johan. *Leoni* I. Papæ serm. de annivers. die assumpt. serm. II. de natal. Apost. *Prosperi* in epist. ad Ruffin. & contr. Collator. c. 35; *Theodoret* lib. III. Hæret. fabb. c. 5. Bedæ in cap. XXII. Lucæ; *Theophylacti* ad I. c. *Oecumenii* ad h. I. *Euthymii Zigabeni* ad h. I. *Petri Damiani* serm. XXVII. de SS. Petro & Paulo; *Drogonis* lib. V. de Sacram. Domin. pass. *Lombardi* lib. III. dist. 17. *Innocentii* III. in serm. I. de sanct. Petro & Paulo; *Hugonis Card.* ad Luc. XXII: *Alberti* M in h. I. *Thomæ Aquinatis* caten. in h. I. *Bonaventuræ* in h. I. *Glossa interlin.* in h. I. *Nicolai Lyrani* in h. I. *Occami* lib. V. dial. c. 3. *Dionysii Carthusiani* in artic. XLVIII. in Lucam; *Thomæ Cajetani* in c. XXII. Luc. *Ioannis Majoris* in h. I. *Ioannis Arborei* in h. I. *Ioannis Benedicti* in h. I. *Ioannis Gagnei* in h. I. *Dominici Banni* in fulsoribus ad 22. q. 1. art. 10. dubit. IV. concl. 3. *Ioannis Maldonati* Comm. in h. I. *Ioannis Andrea Coppensteinii* part. III. quadrihor. *Gabrielis à Porta Jesuita* in dictat. Burdigal. anno 1634. Paris. editis. *Stephani Menochii* in cap. XXII. Luc. *Alexandri VII.* P. R. in literis ad Lovanientes. anno M DC LXII. exaratis, quippe in quibus Augustinum & Thomam Aquinatem tanquam præclarissimos Ecclesiæ Catholica Doctores commendat.

§. 35. II. Altera expositio est eorum, qui tradunt, orasse Christum, ut Romana Ecclesia per Petrum fundata à fide nusquam deficiat. Pro hac expositione allegantur *Lucius* I. epist. 1. ad Episc. Hispan. *Felix* I. epist. ad Benign. *Agatho* P. R. in epist.

2.  
Expositio.

D

ad Con-



ad Constant. Imper. *Petrus Damianus* serm. xxiii. de nativ. Bapt. *Gregorius VII.* P. R. epist. I. ad Simandens. Archiep. *Jacobus Cardinalis Vitriacus* Orient. hist. c. LXXV. *Thomas Aquinas* in expos. Symboli. *Johannes XXII.* P. R. in canoniz. Thomæ; §. vii. *Pius II.* P. R. epist. cccxcvi. ad Mahomet.

3.  
Expositio. §. 36. III. Expositio eorum est, qui volunt orasse Christum, ut *Sedes Petri, seu Apostolica Sedes, à fide nusquam deficiat.* Ita exposuisse fertur *Leo IX.* P. R. epist. V. ad Petrum Antioch. *Gregorius VII.* lib. II. epist. 31. ad Henricum; & lib. III. epist. 18. ad Simeonem Hisp. Episcop. *Bernardus* epist. CXC. ad Innocent. *Innocentius II.* P. R. epist. ad Senon. Concil. *Innocentius III.* epist. ad Arelat. Episc. & serm. II. de consecr. Rom. Pont. & serm. III. de ead. *Albertus M.* in cap. XXII. Luc.

4.  
Expositio. §. 37. IV. Classis eos continet, qui eradunt, orasse Christum, ut *universalis Ecclesia, vel etiam universale Concilium, à fide nunquam deficiat*: sic tradidit *Leo IX.* epist. 9. *Hilbertus Cenoman.* in epistol. de calamitate Paschalis II; *Goffridus Viterbiens.* chron. part. XVI; *Thomas Aquinas* in 22. q. II. artic. VI. & quæst. XXV. artic. I. *Benaventura* in c. XXII. Luc. *Guilielmus Occam.* lib. V. dial. c. 13. *Thomas Valdensis* t. I. doctrin. l. II. artic. II. c. 19. *Martinus V.* approbans Thomæ Commentarios. *Petrus Alliac.* part. III. de auctor. Eccles. c. 1. & 4. *Johannes Gerson* de potest. Eccles. concl. IV. *Joannes Brevicora* de potest. Eccles. & Concil. *Beatus Vincenzius Ferrerius* serm. de fer. VI. post Lat. *Nicolaus Clameng.* de corrupt. Eccles. stat. c. 25. *Nicolaus Tudesqus*, seu Panormitanus, in cap. significasti. de elect. *Jacobus Almainus* de auctor. Eccles. c. 10. *Cyprianus Benetus* de non mutand. Pasch. fundam. 13. *Magister Franciscan.* in mandat. anno 1532. citante Raynaud. in t. X. annal. Eccles. *Johannes Driedol.* lib. IV. de Eccles. dogmat. cap. 4. part. 3. *Franciscus Victoria* de potest. Pap. *Antonius Cordub.* Theol. qq. lib. IV. q. I. præpos. 3. 4. q. 3.

Judicium. §. 38. Habes de loco Lucæ expositiones Doctorum, qui apud Pontificios pro Catholicis habentur, quatuor diversas, quarum primam Bellarminus loc. cit. refellere conatur; sicut & quartam, tanquam utramq; falsam; Et tamen prima illa unanimi Patrum, etiam in Conciliis collectorum, sententia recepta, & con-

continuata est, usque ad tempora Bellarmini; qui post annum M. D. LXXVII. Romæ docere instituit. Altera expositio pro se se habet plerosque Episcopos Romanos, & Romæ addictos quosdam pauculos Theologos; i. e. testes omnes de domo; imo nec eos omnes genuinos; Nam Lucii I. epistola; ut & Felicis I. pro supposititiis habentur ab ipsis Pontificiis, uti Launojus in literis ad Antonium Varillaum λόγους ἀντιλογίας demonstravit: Reliqui recentiores sunt. De tertia idem judicandum est. Prima sententia, quæ unanimem pro se se habet Patrum consensum, est communis Lutheranorum expositio; Pontificiis autem ea, utrisque saltem, non arridet, cum videant, si Christus de solo Petro locutus est, ad suum Pontificem Romanum id non spectare. Expositio Bellarmini nulli istarum quatuor convenit; Est enim *tertia* (rectius quinta) ejus expositio hæc: Quod Dominus duo privilegia Petro impetraverit: Vnum, ut ipse non posset unquam veram fidem amittere, quantumvis tentaretur à Diabolo, id quod est amplius, quam donum perseverantia; dicitur enim perseverare usque in finem, quem qui licet interdum cadat, tamen resurgit, & in fide fidelis invenitur. At Petro Dominus impetravit, ut non posset unquam cadere, quod ad fidem attinet. Alterum privilegium est, ut ipse tanquam Pontifex non posset unquam docere aliquid contra fidem, sive ut in sede ejus nunquam inveniretur, qui doceret contra veram fidem. Ex quibus privilegiis primum fortasse non manavit ad posteror, secundum sine dubio manavit ad posteror, seu successores. Hanc vero suam expositionem ex unanimi Patrum consensu; aut judicio Ecclesiæ Catholicæ non probat; Licet igitur Ecclesiæ Romanæ Doctoribus fovere, & docere expositiones, quæ Ecclesiæ Catholicæ, & Patrum antiquorum non sunt, i. e. contra sanctionem Concilii Tridentini.

§. 39. *Tertium dictum* est Johan. XXI. 15. quod Bellarminus lib. IV. de P. R. c. 3. adducit, ut probet, Pontificem Romanum errare non posse, cum docet Ecclesiam Catholicam, ne ipso errante tota Ecclesia erraret; sicut adduxerat lib. I. de P. R. cap. 14. 15. 16. ut obtineret Pontificem Romanum institutum esse pastorem & Doctorem totius Ecclesiæ, quem tota Ecclesia audire teneatur, & sequi, minimè vero judicare; Dictum igitur ille exponit de

III.  
Ioh. XXI. 15.

folo Petro, & folis ejus fuccefforibus, Epifcopis Romanis; fed, de folis hifce intelligenda effe ifta Chrifti verba, unanimis Patrum confenfus non permittit, quippe qui Epifcopo Romano *Coepifcopos* adjungit, quod faciunt ipfimet R. Pontifices *Stephanus*, I. epift. ad Cypr. 46; & 48; *Liberius* P. R. ad Eufebium fcriptis Epiftolis; item in epp. ad Urfacium, Valentem, & Germinium, ad Constantium Imper. *Siricius* P. R. epift. IV. Ad Anyfium &c. *Innocentius* I. P. R. epift. VII. ad Ruf. XI. ad Aurelium Carthag. XIV ad Atticum; XVII. ad Acacium; XIX. ad Martianum; XX ad Ruf. cap. 5. ad Carthaginense Concilium; Ad Milevitanum Concilium; Confer epift. XCIII. inter epp. Auguftini; *Zofimus* P. R. epift. ad Hefych. cap. II. Ad Aurelium; *Bonifacius* I. P. R. epift. II. & III. ad Ruf. Epift. ad Epifc. Theffal. &c. *Caelestinus* epift. ad Epifc. Gal. c. 8. Ad Perigenem &c. Ad Ephesinam Synodum; *Xyftus* III. epift. I. ad Perigen. Epift. II. ad Syn. Theffal. Epift. III. ad Procl. IV. ad Illyr. Ad Cyril. Alexand. Ad Johan. Antioch. *Leo* I. epiftol. V. ad Dorum; VII. ad *Theodof.* XVIII. ad Pulcher. XXV. ad Synod. Roman. XXXIV. ad Fauff. XXXIX. ad Pulcher. XL. ad Anatol. c. 4. XLIV. ad Martian. XLIX. ad eund. LI. ad Pulcher. LII. ad Epifcopp. Galliar. LIII. ad Anatol. cap. 6. LIV. ad Martian. LV. ad Pulcher. cap. II. & 4. LX. ad Pulcher. Ad Maximum Antioch. c. II. LXIII. ad Theodor. c. 6. LXIX. ad Martian. LXX. c. II. ad eundem. LXXIII. ad Leonem; LXXIV. ad eundem; LXXXVI. cap. I. ad Nicetam; LXXXVII. c. II. ad Mauritanæ Epifc. LXXXIX. ad cap. 3. 4. 8. Viennenf. Epiftol. ad Turrib. c. 17. Epift. C. ad Gennad. CV. ad Julianum Coënf. *Hilarius* P. R. epift. ad Afcan. *Simplicius* P. R. ad Johannem Raven. Felix III. in Synod. Roman. *Gelasius* I. epift. 7. ad univerf. Epifc. Ep. IX. ad Epifc. Lucan. XII. ad Eonium; *Anaftafius* II. epift. ad Anaftaf. Imper. Symmachus epift. II. ad Eonium; & epift. X. ad univerf. Epp. Gall. *Hormifda* epift. X. ad Avitum; XI. ad Anaftaf. XIX. ad eund. XXII. ad Doctrotheum; LI. ad univerf. Hifpan. Epifc. &c. &c. &c. *Agapetus* I. pift. II. ad Afric. III. ad Reparat. *Vigilius* epift. IV. ad Juftin. VI. ad Auxentium &c. &c. *Pelagius* I. epift. III. XI. XII. ad Childebertum; *Pelagius* II. epift. III. ad Gregor. Et ne prolixior fim,

can-



eandem vocem agnoscunt reliqui Romani Episcopi, *Gregorius I. Martinus I. Gregorius II. Gregorius III. Zacharias, Gregorius IV. Leo IV. Nicolaus I. Hadrianus II. Johannes VIII. Johannes XX. Leo IX. Nicolaus II. Gregorius VII. Victor III. Paschalis II. Alexander. III. Gregorius VIII. Innocentius III.* Verba ipsorum, & loca excerpfit, & proposuit Launojus epistol. ad Raymundum Formentinum Theologum Parisiensem, & Aurelianensem Canonicum, scripta Paris. anno 1666. & continetur tom. V. Epistolarum. Hinc infertur: si Episcopus Romanus habet *Coëpiscopos*, etiam habebit *Compastores*. Quod enim Græcè *Episcopus* dicitur, id Latinè *Pastor* intelligitur; & unus (specie) omnium est pastortus, sicut est Episcopatus omnium unus, uti ex Cypriani epist. LII ad Anton. & lib. de unitate Ecclesiæ; Optati Milev. lib. II. adv. Parmen. Et Hieronymi Epistola ad Evagrium, & Symmachi P. R. epist. I. ad Æonium, &c. Probat Launojus idem p. 59. Si vero Romanus habet *Compastores*, ipse non erit solus, de quo Christus dixerit: *pasce oves meas*.

§. 40. *Excipit*: Omnes quidem Episcopos esse pastores, sed supremum & universalem pastorem esse Pontificem Romanum; & talem intelligere Christum, cum Petro dixit: *pasce oves meas*. *Expositio*. Expositio hæc adversatur expositioni ipsorummet Pontificum Romanorum, quando disputarunt adversus Oecumenicum Constantinopolitani Episcopi dominatum, ex eo fundamento, quod non sit unus universalis Ecclesiæ Episcopus, à quo Ecclesia unice pendeat: Pro hac sententia Launojus allegavit Gregorii I. loca duodecim; & successores Gregorii tres, Hadrianum I. in epistola ad Constantinum & Irenem; Nicolaum I. epist. ad Hincmarum & Leonem IX. epist. I. ad Michaëlem. Confer, si placet, quæ nos alibi disputavimus: Antiq. Eccles. Trifec. sec. II. pag. 212, § 18. & sec. III. pag. 544, & pag. 998, seqq.

§. 41. Tridentinam scripturas interpretandi regulam Pontificiis ipsis esse contrariam, tribus illustribus exemplis probavimus, & consequitur inde Thesis XII. *Pontificios circa regulam interpretandi scripturas fundamentaliter (quod dicunt) sentire*. In eo quidem conveniunt omnes, quod amplectantur

XII.

verba Sessionis IV. Tridentinæ, de modo interpretandi, vel explicandi scripturas; sed in sensu verborum istorum *dis sicut* *con* dissentiunt. Nonnulli enim ita intelligunt verba, quod eum sensum tenuerit, & teneat, sancta mater Ecclesia, quem tenuit, vel tenet Episcopus Romanus, & Cathedra docens: Quo sensu capiunt, qui cum Cajetano *παράλογισσι*: *Impossibile est universalem Ecclesiam errare in fide*. E. *impossibile est Papam in iudicio diffinitivo auctoritative errare in fide*: opusc. de potest. Pap. c. 9. Alii ita; quod eum sensum tenuerit, & teneat sancta mater Ecclesia, quem tenuit, vel tenet Concilium, etiam si Pontifici Romano contradistinctum, & oppositum; sic Launojus, & Gallicanus Clerus communiter: Alii ita: quod eum scripturæ sensum tenuerit, & teneat Ecclesia, vel etiam is, qui genuinū sensum tenere vult; qui tenuit, vel tenet sensum, *unanimes patrum* Interpretū consensu approbatum; illum autem unanimem Patrum consensum æstimant ex testimoniis extantibus, plerorumque saltem, vel præcipuorum Patrum; Hoc sensu idem Launojus, & plures alii capiunt, quando pro explicatione alicujus loci scripturæ laudant explicationes nonnullorum patrum, ejusdem, vel diversorum seculorum, id quod Pontificiis solenne est.

§. 42. Hunc dissensum Pontificiorum inter sese de sensu regulæ Tridentinæ, dico, esse fundamentalem. Probo dictum: Quicumque dissentiant in fundamento ipso explicandi scripturas, illi dissentiant fundamentaliter: Pontificii dissentiant in fundamento ipso, E. dissentiant fundamentaliter. Major est clara ex terminis, & procedit à definitione ad ipsum definitum; Minor ex enumeratione diversarum inter Pontificios sententiarum §. præced. facta, patescit. Nonnulli enim eorū dicunt, Papam non posse esse hæreticum, nec fuisse unquam, nec errare posse in fide, quando ex Cathedra definit; Alii contra hæc omnia affirmant; Ad fundamentum autem interpretis scripturæ, sive recipiendi, sive repudiandi, hoc maxime pertinet, infallibilis sit, nec ne? Hæreticus esse possit, vel sit, nec ne? Unicus sit, nec ne? Requisita interpretationis, & definitionis observaverit, nec ne? Accedit, quod de sensu, & interpretatione Patrum antiquorum certi esse non possumus, nisi certi simus de auctoribus scripto-  
rum,

rum, quæ allegantur, genuini, an adulterini circumferantur; de-  
que sensu verborum, quibus scripturam explicant; De utroque  
vero horum inter Pontificios iterum controversia est capitalis;  
neq; definivit adhuc dum siue Papa, siue Concilium aliquod, siue  
Ecclesia ipsa Romana, aut Catholica, quæ veterum monumen-  
ta sint genuina, quæ adulterina; quæve interpretatio ipsorum,  
Curialium, an aliorum, Theologorum sit menti veterum, & ipsius  
Spiritus sancti conformis? Hæc vero omnia in ipsum interpreta-  
tandi incurrunt fundamentum.

§. 43. Consequitur hinc Thesis XIII. *Regulam, Triden-*  
*tinam esse applicatu impossibilem.* Si enim consideramus verba  
(1.) *quem tenuit, & tenet sancta mater Ecclesia,* quæro, ubi ille  
sensus exstet, ut certò sciri possit? Forte in aliquo universali  
commentario, in quo contineantur explicationes omnium Eccle-  
siarum particularium; vel præcipuarum Orientis, & Occidentis,  
à Christo ad hæc usq; tempora continuatarum? Sic quidem, o-  
porteret exstare, ut haberemus sensum, quem tenuit, & adhuc  
tenet Ecclesia mater; Sed talis commentarius universalis nuspi-  
am terrarum exstat. Forte igitur ore tenus Ecclesia mentem su-  
am circa scripturæ sensum explicabit? Neque hoc facit; Est e-  
nim Ecclesia nomen collectivum, ex pluribus individuis coa-  
gmentatum; aut igitur hæc omnia erunt audienda, aut quædam,  
aut unicū; *Omnia* ut non adiri, ita nec audiri possunt; neque, cre-  
do, omnia conspirarent in unam interpretationem, si omnino o-  
mnia & adiri, & audiri possent; sed nec *quodā* possunt, hætenus,  
quatenus nescimus, quæ sint illa quædam? num reliqua suum  
sensem illis commiserint significandum? num bona fide retule-  
rint? *Unicum* igitur individuum fuerit; At hoc neque est ipsa  
mater Ecclesia, quippe quæ ex pluribus constat; neque prius au-  
diendum est nomine totius Ecclesiæ, quam probaverit, suum  
sensem esse totius Ecclesiæ sensum; Imò tali individuo recla-  
mant illi omnes, qui etiam ex ipsis Pontificiis statuunt, Papam  
errare posse, & sæpius errasse etiam in explicanda scriptura sacræ  
Taceo, si omnino Papa Romanus esset siue ipsa sancta mater Ec-  
clesia, siue os Ecclesiæ totius, tamen non idoneum esse, ex quo  
singuli discant scripturam intelligere, cum nemo hætenus Pon-  
tifi-

XIII.



tificum Romanorum totam scripturam authenticè explicuerit, siue ore, siue scripto; neque adiri ab omnibus possit, aut audiri, & intelligi tuto, dum scripturas interpretatur.

§. 44. Non minores difficultates sese offerunt, si (2.) *unanimem Patrum consensum* consideremus. Nam (1.) non omnes patres explicuerunt scripturas, & in scripturis loca difficiliora, & controversa: quare impossibile est, omnium haberi consensum. (2.) Neque tenemus hodie omnium, qui explicuerunt, commentarios, quãdoquidem magna eorum pars perierit, & quæ supersunt, corrupta sint, vel dubia, nonnunquam etiam plane adulterina. (3.) Neque, quod integrum superest, ab omnibus vel legi, vel intelligi potest, qui quidem genuinum scripturæ sensum desiderant; (4.) Neque in ipsis inveniretur ille adeo desideratus consensus, quoniam inter sese nonnunquam consentiunt, ut horologia, i. e. minimè. Hæ & similes difficultates anxium scripturæ lectorem de consensu Patrum cogunt desperare.

#### XIV.

§. 45. Tandem res eo redit, ut Thesis XIV. statuamus: *Regulam illam Tridentinam falsam esse*. Falsa regula est, qua observata falsum per se sequitur; At talis est Tridentina regula, ut per se sequatur, si cœca fide eam sequamur: Probatur manifesto exemplo de necessitate Eucharistiæ etiam infantibus præbendæ: In hunc sensum antiquitatem quondam, siue Ecclesiæ ipsam, siue Patres consentientes spectes, explicuisse verba Christi Joh. VI. 53. in confesso est apud eos, qui antiquitatem sciunt; Pone jam, regulam Tridentinam sectandam esse, ultro sequetur, falso scripturam sacram sequendam esse, quia falsus est ille ipsi attributus sensus, tanquam de absoluta Eucharistiæ necessitate loqueretur. Porro, si nonnullorum, & eminentiorum quidem, Patrum consensus in explicanda scriptura sacra sufficit, ut, tanquam ex communi consensu profecta, explicatio vera sit, sequetur, etiam eam veram esse, quæ tamen falsa est, & habetur, ab ipsis Pontificiis; *Probo*: Origenes præcipuus est, & antiquissimus scripturæ interpret; sed quam infelix, ipsi Papistæ non diffidentur; & tamen eum secuti sunt plerique & præcipui Patres in explicanda scriptura, Didymus, Hilarius, Hieronymus, Ambro-



Ambrosius, Eusebius, alique; neque semper, imo raro, expresserunt, esse eas Origenis, non suas, explicationes, quare incautus lector, dum Hieronymi, vel Ambrosii explicationem aliquā legere se putat, Origenis legit Pseudhermenias. Fatetur hoc Sixtus Senensis lib. IV. Bibl. sanct. p. m. 303. de præstantissimo scripturarum interprete Hieronymo: *Solet Hieronymus, in colligendis veterum explanationibus sæpenumero illorum sententias, & interdum quoque nonnullas aberrantes & absurdas opiniones referre, suppressis nominibus auctorum, quos ad evitandum lectoris radium semel in præfationibus librorum nominare consuevit, omisis etiam aliquando modestia gratia confutationibus earum opinionum, quod eas alibi plenissime confutasset: quo fit, ut dum sine discrimine permiscet aliena suis, videatur nonnunquam aliorum errores recipere, & ex animi sui sententia pronunciare; Atque hinc occasionem utcumque nacti sunt Hieronymiani obrectatores, infestandi eum, quod Hæreticorum dogmatibus omnia pene commentaria sua resperferit.* Subjungit quidem etiam Hieronymi defensionem, sed ita comparatam, ut non sufficiat; Etsi enim interdum addiderit: *Quidam hoc dicunt; alii hoc autumant; nonnulli sic sentiunt;* Non tamen ubique id addit; neque, qui sint illi *quidam, & alii, & nonnulli,* exprimit; multo minus hæreticos esse, & hæreticas, vel falsas, esse ipsorum interpretationes, & à sua discrepantes, addit, ut caveri illæ possint. Vide Johan. Dallæ. de usu Patr. c. 6. p. m. 151. Accedit Patrum ignorantia, quod linguas originales attinet, & imprudentia, dum versiones vitiosas, ut plurimum Græcam LXX. Interpretum, in explicanda scriptura sacra sectabantur; Hinc factum est, ut errantibus versionibus, & ipsi errarent in scriptura explicanda.

§. 45. Sufficiat unicum indigitasse locum, Prov. VIII. 22. ubi in Græco habetur *ἐκτίσεν* creavit; pro *ἐκτίσεν*, vel potius *ἐκλήκατο* possedit; Christophorus Sandius, Neo-Arianus, in appendice paradoxarum interpretationum, pag. m. 333. locum hunc producit, & ejus versiones aliquot, nimirum non Græcam solum LXX. interpp. sed etiam Chaldaicam, Syriacam, Arabicam, & vulgatam antiquam; quæ omnes legant: creavit, vel condidit; His jungit suffragia XXV. Patrum antiquissimorum, qui

Exemplum  
Prov. VIII.  
22.

perinde legerint *ἐκτίσθαι*, vel *ἐκτίσασθαι*, creavit, vel condidit, sunt autem isti patres: Ignatius Martyr, Justinus Martyr, Athenagoras, Tatianus, Irenæus, Clemens Alexandrinus, Tertullianus, Origenes, Cyprianus, Lactantius, Eusebius Cæsar, Athanasius, Meletius, Hilarius, Nazianzenus, Ambrosius, Basiliius, Hieronymus, Cyrillus Alexandrinus, Theodoretus, Ithacius, Arnobius Junior, Fulgentius, Vigiliius. Subjungit Philonis suffragium; Et interpretationes Patrum ad loca parallela. Lectionem hanc duo potissimum absurda sunt consecuta (1.) Quod nonnulli Patrum inciderint in errorem Arianorum, statuentes, Filium DEI esse creaturam: (2.) Quod alii coarctè scripturæ istum locum explicuerint, dicentes: creare & gignere esse interdum synonyma; creasse Patrem suum filium, dum genuit *sine immixtione aliqua ac demutatione*, uti loquitur Hilarius de Synodis, creasse, quando humanam naturam filius assumpsit, seu quando secundum humanam naturam genitus est, & legunt: *creabit*; ut Ambrosius & Chrysostomus; creasse non simpliciter, seu *secundum se*, sed *secundum progressum*, quem ad creandum facit, juxta Grégor. Nazianz. orat. IV. de Theol. Creasse, dum fecit creare alias creaturas, exponente Athanasio orat. III. adv. Arianos; Confer Cornéli. à Lap. Coïnent ad l. cit. Quis vero dixerit, eam Patrum inter sese in versione consentientium interpretationes esse scripturæ sacræ, & spiritus sancti menti conformes? Qui plura velit exempla interpretationum ejusmodi patristicarum à genuino scripturæ sensu abeuntium, adeat unius antea nominati Sandii Interpretationes paradoxas. Nam tot deprehendet earum, quot plus quam satis fuerint, probando, consensu Patrum in explicanda scriptura non semper standum esse.

Manet igitur regulæ Petrinæ ea integra laus, quod sola illa ducat ad mentem Spiritus Sancti; *Et quicumque hanc regulam secuti fuerint, pax super illos, & misericordia, & super Israël DEI! Amen!*

Doctif-

Doctissimo Dn. JOH. DANIELI BUCHIO,  
Amico suo pl. dilecto.

**A** *Sfiduè volvis relegisq; volumina sacra  
Optume BUCHI, quem pietas studiumq; sa-  
crarum*

*Rerum mirificè commendant. Est TIBI cura  
Lex Domini, quam quaris. Te quoq; curat JOVA.*

*scr.*

Johannes Faust, D. PP. Colleg.  
Philos. p. t. Decanus.

---

*Ad Eximium Dn. Respondentem,  
Amicum dilectum.*

**S**criptura in sacra loquitur quia Spiritus unus,  
Scriptura interpres sufficit ipsa sibi.  
Spiritus ille DEI solus divina revelat  
Dogmata, quæ loquitur solus & ille docet.  
Hoc TU defendis. Cedet feliciter omne,  
Quicquid agis. Studiis hoc decus adde Tuis.

*scr.*

*Isaacus Faustius. D.*

---

Pereximio atque Præstantissimo Dno.

Respondenti, Amico suo perdilecto.

**Q**uis sit scripturæ sensus genuinus, & ipsi  
Divinæ menti congruus? ergo rogas;



Num, quod Roma putat, quem conda Ecclesia promit?  
Aut Patres, quando convenit inter eos?  
Aut pater ille Patrum, Romanus Papa, revelat?  
Aut quem Concilium plenius esse putat?  
Num quem fisa sibi ratio? vel spiritus albus,  
An niger, in somno voce silente loquens?  
Nullus is est! igitur quis erit? quem spiritus edit  
Ille Prophetarum qui dedit ora loqui!  
Ille suam verbique sui vult prode re mentem  
Per loca scripturæ splendidiora suæ.  
Quare scripturæ mentem si nosse laboras,  
Obscuris confer splendidiora locis:  
Idque tuum, quod habes, libri Te, *Buche*, docebit  
Nomen, & æternis inferet id tabulis!

In gratiam  
Auditoris sui hactenus  
diligentissimi f.  
Exercitii

*Præses.*

---

*Præstantiss. Dn. Respondenti,*  
*Amico suo pl. dilecto.*

**D**Ivini, *Buchi*, quæ sit sententia verbi  
Ignorat Ratio, Spiritus ipse docet.  
*Optimus Interpres verborum est quisq. suorum,*  
Dicere! qui possit quid sua dicta velint.  
Spiritus est Author verbi, hoc Interprete gaudet,  
Hoc spirante doce dogmata sancta DEI!

*grat. scripsit.*

*M. Joh. Joachim Zentgraff,*  
*Eccles. Neopetr. Wilh. Pad.*











